

■ TRIBUNA POLITICA

Elecciuns a Berna

DA SILVA SEMADENI,
CUSSEGLIERA NAZIUNALA PS/GR

Isto vegnir procurà che las regions dal pajais e las regions linguisticas vegnian represchentadas adequatamain», quai legian ins en la Constituziun federala tar la dumonda da la cumposiziun dal cussegl federal (CF). Quai è impurtant per la coesiun da noss pajais pluriling. La Svizra taliana n'è dapi la demissiun da Flavio Cotti il 1999, damai dapi 18 onns, betg pli represchentada en il CF. Il professur d'istorgia emerità Urs Altermatt numna quai ina «anomalia paradoxa». En cumparaziun cun la Svizra romanda sto lutgar la pli pitschna Svizra taliana adina puspè per ses sez en il CF. Ina represchentanza permanenta n'ha ella enfin oz betg savì far valair. Dapi il 1848 era ella represchentada mo en la mesadad dal temp en il CF. L'Assamblea federala ha elegì pli che 100 cussegliers federali. Be set da quels provegnivan da la Svizra taliana, tuts dal chantun Tessin. Il 1962 fiss quai quasi gartegià er ad in candidat dal Grischun talian: Ettore Tenchio da Roveredo era il candidat uffizial da la pcd. El ha dentant pers la lutga en il tschintgavel scrutini encunter il Vallesan Roger Bonvin. La Rumantschia aveva mo in cusseglier federal: Felix Calonder, dal



1913 enfin il 1920. Oz, sunter la demissiun da Didier Burkhalter, è la stellaziun per la Svizra taliana buna per turnar en il CF. Cun quatter resp. dus cussegliers federali e cusseglieras federalas èn la Svizra tudestga e la Svizra franzosa represchentadas bain en l'executiva. La Svizra dal sid spetga percenter dapi lung temp malpazientamain sin ses bramà agen sez. Ils 20 da settember ha l'Assamblea federala puspè la pussaivladad dad ademplir questa incumbensa costituziunala.

Dapi il 1848 ha igl dentant dà en il cussegl federal era be set dunnas! Cun be duas cusseglieras federalas – fitg cumpetentas – èn oz las dunnas sutrepreschentadas. Ellas furman però cun 50,42% la maioritad tar la populaziun en Svizra. Atgnamain stuessan chapir uschia tut

las partidas ina represchentanza commensurada da las dunnas en il CF sco incumbensa permanenta – e realisar quella era consequentamain. Quai vala gist era per la Partida liberaldemocratica (pld) che ha gi' enfin oz cun Elisabeth Kopp mo ina suletta cussegliera federala. I n'è dentant betg scrit en la Constituziun federala, ma ina represchentanza commensurada da las dunnas stuess esser 46 onns sunter l'introducziun da lur dretg da votar e d'eleger ina chausa evidenta.

Quala pretensiun è da mai pli impurtanta? Igl è evident che la pld savess ademplir cun ina dunna da la Svizra taliana tut las pretensiuns en ina giada. E cun Laura Sadis (56) stat er almain ina candidata qualificada ed indipendente a disposiziun. Ella è ina politicra cun gronda experientscha, er cun da quella en in'executiva chantunala. Laura Sadis era cussegliera communal da la pld, deputada pld en il cussegl grond, cussegliera naziunala pld, cussegliera guvernativa pld. Ma ella vegn ignorada cun la proposta unica da la pld tessinaisa. L'emprima cussegliera federala da lingua taliana sunter set umens resta uschia in siemi. Igl è ina schanza manchentada per las dunnas, per la Svizra taliana, per la pld.